



Podrška preduzećima

Opština Srebrenica raspisala je javni poziv za dodjelu novčane podrške malim i srednjim preduzećima i zanatsko-preduzetničkim radnjama sa područja ove opštine, za šta je ove godine planirano 100.000 KM.

Riječ je o bespovratnim novčanim sredstvima za podsticaj privrednom razvoju i novom zapošljavanju u 2018. godini, saopšteno je iz Informativne službe ove lokalne zajednice. Naglašeno je da vlasnici privrednih subjekata koji su prethodnih godina zloupotrijebili sredstva, neće uči u izbor za dodjelu podsticaja za ovu godinu.



Masline i divlji šipak

Poljoprivredni proizvođači u Trebinju veliku zainteresovanost pokazuju za uzgoj masline i šipka, jer je ovo područje izuzetno povoljno za proizvodnju tih kultura, rekao je za Srnu Veselin Dutina, direktor Agrarnog fonda Trebinje.

On kaže da je veliki broj malih proizvođača odlučan da zasadi masline i šipak, te da će im Agrarni fond pomoći da pokrenu tu proizvodnju i da ukažu šta je najisplativije da ne bi došlo do zasićenja kao što je to bilo u proizvodnji vina.

Dutina ističe da su upravo proizvodnju masline i šipka prepoznali kao kulturu budućnosti.



Rekordna prodaja uglja

Rudnik i termoelektrana Ugljevik ostvarili su rekordnih gotovo 11 miliona KM prihoda od prodaje uglja u prošloj godini. Prihod od 10.760.221 KM po ovom osnovu dvostruko je veći u odnosu na 2016, a u odnosu na prethodne godine uvećan je nekoliko puta. Ukupno je prodato 190.545 tona uglja različitog asortimana, kao što su prečišćena kocka, orah, grah i klasirani komadi, prenosi Srna.

Ugljevički rudnik je u januaru prebacio plan proizvodnje uglja za 22 posto, dok je proizvodnja u februaru, uprkos nepovoljnim vremenskim uslovima, ostvarena sa 99 posto od plana.

Gubi li Bosna i Hercegovina tlo pod nogama?

Posmatrano s globalnog UN-ovog nivoa, zadatak svake zemlje je da zaustavi procese degradacije i gubitaka zemljišta i da ih do 2030. svede na nulu

Piše: **DARKO OMERAGIĆ**

Naučna istraživanja Poljoprivredno-prehrambenog fakulteta (PPF) Univerziteta u Sarajevu pokazuju da su u FBiH trajno izgubljena najkvalitetnija poljoprivredna zemljišta, te da direktni gubici, samo za izgradnju naselja i infrastrukture od 2000. do 2012, iznose gotovo 65 kvadratnih kilometara.

Samo na području Tuzlanskog kantona ima više od 55 kvadratnih kilometara tehnogenih pustinja, a identificirano je više od 650 divljih deponija, koje zauzimaju površinu od čak 80 kvadratnih kilometara, što je, primjerice, više od pola površine ukupne teritorije Sarajeva.


Zajednički problem cijele FBiH je i erozija, odnosno hiljade registriranih klizišta, te nereguliran vodni režim u poplavnim područjima.

Da je BiH dio globalnih trendova u brizi za tlo, pokazuje i projekt Podrška u donošenju odluka za uključivanje i širenje praksi održivog upravljanja zemljištem, kojeg u FBiH provodi Poljoprivredno-prehrambeni fakultet Univerziteta u Sarajevu. Cilj projekta je da pomogne određenim općinama u definiranju i selekciji prioritarnih mjera zaštite i unapređenju zemljišta, što će doprinijeti ne samo sprečavanju degradacije već i revitalizaciji degradiranih površina, koje su brojne.

Daleko od birokratije

Pedolog prof. dr. Hamid Čustović, rukovodilac projekta, ukazuje na važnost ovog poduhvata, koji slijedi glavne ciljeve FAO-a (Organizacija za prehranu i poljoprivredu UN-a) i GEF-a (Globalni fond za okoliš), insistirajući na adekvatnom obrazovanju.

“Edukacija, u prvom redu, općinskih službenika, zaduženih za zemljište i prostorno planiranje, jedan je od prioriteta projekta. Općine su prepoznale potrebu za ovakvim projektom i edukacijom u oblasti zaštite i upravljanja zemljištem, kojeg provodi Poljoprivredno-prehrambeni fakultet već dugi niz godina, kao i resorna ministarstva, od kojih se očekuje podrška u rješavanju brojnih problema u oblasti zemljišta, o kojima se rijetko i govori.



Čustović: Projektom je obuhvaćeno i pitanje komasacije na području općine Ravno / AMER KAJMOVIĆ

Širenje dobrih praksi i mjera, u drugim lokalnim zajednicama, s istim ili sličnim problemima, jedna je od glavnih ideja projekta. U ovom projektu je, također, obuhvaćeno pitanje komasacije zemljišta, čija se provedba odvija na području općine Ravno”, kaže profesor Čustović.

Na radionici održanoj 15. februara u Sarajevu na PPF-u, podršku projektu dao je i UNEP (Program za okoliš UN-a), čija predstavnica Amina Omičević vjeruje u budućnost projekta, jer se kroz njega traga za rješenjima problema direktno na terenu i kroz edukaciju lokalnog nivoa.

“Očuvanje bh. prirodnih resursa, uključujući i zemljište, trajnija je i kvalitetnija razvojna šansa, nego njihovo neodrživo iskorištavanje ili zanemarivanje. U tom smislu, i proces dostizanja neutralnosti degradacije zemljišta, u našoj zemlji, kroz rad s lokalnim zajednicama, daje nadu da će se upravljanje zemljištem shvatiti ozbiljno i da će se zaštititi zemljišta, kao ključnog resursa, posvećivati značajnija pažnja”, kaže Omičević.

Uključivanje BiH u regionalne programe i projekte GEF-a donosi višestruku korist, kako jačanju međunarodne saradnje tako i u razmjeni iskustava, znanja, ali i tehnika i tehnologija, u procesima koji su vezani za održivo upravljanje zemljištem.

Očuvanje bh. prirodnih resursa, uključujući i zemljište, trajnija je i kvalitetnija razvojna šansa nego njihovo neodrživo iskorištavanje ili zanemarivanje

Doc. dr. Senad Oprašić, koji je u ime Ministarstva vanjske trgovine i ekonomskih odnosa BiH bio učesnik ovog sastanka, smatra da se kroz ovaj projekt pokazuje zrelost u ispunjavanju međunarodnih obaveza, te direktno jačaju ekspertna znanja u BiH i uključuje u provedbu GEF-ove strategije zaštite životne sredine i održivih razvojnih ciljeva.

Lokalni na putu ka EU

“Činjenica da su najbolji stručnjaci spremni da daju doprinos projektu predstavlja izvrsnu podlogu za jasno definiranje daljih kretanja u procesu održivog razvoja. Primjenom koncepta neutralne degradacije zemljišta, ovakve promjene i štete u budućnosti će se morati neutralisati i stvoriti uslovi da se degradirane površine rekultiviraju, a trajno izgubljene površine nadoknade rekultivacijom. Posmatrano s globalnog UN-ovog nivoa, zadatak svake zemlje je da zaustavi procese

degradacije i gubitaka zemljišta i da ih do 2030. svede na nulu”, kaže Oprašić.

Općine na koje je projektom stavljen akcent suočene su s najvećim problemima degradacije zemljišta. Na području TK-a to su Gradačac, Gračanica, Sapna, Živinice, Kalesija, Srebrenica, Banovići, Kladanji i Grad Tuzla.

Dragica Tešić, direktorica Zavoda za prostorno planiranje i urbanizam, koji djeluje u okviru Ministarstva prostornog uređenja i zaštite okolice TK-a, ističe da je učešće Zavoda u projektu važno.

“S obzirom na to da se radi uglavnom o zahvatima u prostoru, odnosno projektima za čije rješavanje su potrebna značajna sredstva, neophodno je zajedničko angažovanje svih aktera u procesu, od lokalne zajednice do državnog nivoa. U konačnici, svi će imati koristi”, kaže Tešić.

U narednoj fazi projekta u općinama TK-a, koje su izradile Kartu upotrebne vrijednosti zemljišta, kao osnovnu podlogu za prostorno planiranje i usmjeravanje održivog načina korištenja zemljišta, provest će se analiza problema i selekcija prioriteta za rješavanja odgovarajućih mjera.

“Rezultat cijelog procesa treba biti odabir prioritarnih projekata i idejnih rješenja na općinskom, međuopćinskom, kao i regionalnom nivou, za potencijalnu aplikaciju i finansiranje, od domaćih i međunarodnih finansijskih institucija”, zaključuje Čustović.

Ministarstvo okoliša i turizma FBiH priprema izradu Federalne strategije zaštite okoliša za desetogodišnji period (od 2019. do 2029), najavljuje doc. dr. Mehmed Cero, pomoćnik ministra za okoliš u ovom ministarstvu.

“Zemljište kao komponenta okoliša, a istovremeno strateški najvažniji prirodni resurs, ima baznu ulogu u tom strateškom dokumentu. Ovaj projekt će nam pomoći da to uradimo na najbolji način”, kaže Cero.



BiH je dio globalnih trendova u brizi za tlo / AMER KAJMOVIĆ